



IZVJEŠTAJ
SA ZIMSKOG ZASJEDANJA PARLAMENTARNE SKUPŠTINE OSCE-a
Beč, 24. i 25.2.2011.

U Beču je 24. i 25.2.2011. održano 10. zimsko zasjedanje Parlamentarne skupštine OSCE-a na kojem je učestvovala i Delegacija Parlamentarne skupštine BiH u PSOSCE-a: Branko Zrno, predsjedavajući Delegacije, Šemsudin Mehmedović, prvi zamjenik predsjedavajućeg Delegacije, Drago Ljubičić, drugi zamjenik predsjedavajućeg Delegacije, i Jelena Rajaković, sekretar Delegacije.

Parlamentarci zemalja članica Organizacije za evropsku sigurnost i saradnju razmatrali su aktuelna zbivanja u oblastima sigurnosti, saradnje, ekonomskog razvoja i humanitarnih dimenzija, a posebna tema zasjedanja bila je situacija u sjevernoj Africi. Na početku zasjedanja prisutnima se obratio Petros Efthymiou, predsjedavajući PSOSCE-a, koji je naglasio da je ovo vrijeme posebno važno za OSCE u cjelini, budući da se ta organizacija nalazi u nekoj vrsti krize i periodu preispitivanja svoje uloge i značaja. On je istaknuo da su kroz Krfski proces, a potom i samit u Astani, vlade zemalja članica OSCE-a raspravljale o načinima poboljšanja situacije, ali da nisu preduzete mjere koje bi do toga i dovele. Kao rezultat toga OSCE je doveden u stanje krize, gdje je budućnost i relevantnost organizacije dovedena u pitanje, ističući kao glavni problem neposjedovanje odgovarajućih mehanizama kojima bi se OSCE mogao poslužiti prilikom suočavanja s glavnim izazovima današnjice: trgovina ljudima, energetska sigurnost, međunarodni organizirani kriminal itd. On je pozvao prisutne parlamentarce da se bore za ovu organizaciju i založe za njeno obnavljanje. Kao izuzetno važan korak u tom procesu gosp. Efthymiou istaknuo je izbor sljedećeg generalnog sekretara OSCE-a, te uticaj na vlade zemalja članica da se u OSCE biraju i šalju kvalitetni političari.

Audronius Ažubalis, ministar vanjskih poslova Litvanije i predsjedavajući OSCE-a, također se zauzeo za jačanje saradnje i zajedničkog rada svih država članica OSCE-a kako bi on postao efikasniji, te istaknuo da se obaveze i ciljevi OSCE-a, na osnovu Helsinškog procesa, moraju više ostvarivati.

On je osudio nasilje nad civilima u Libiji i zatražio prestanak, kako je naveo, brutalnog nasilja nad stanovništvom.

Nakon zajedničke sesije održan je sastanak **Komiteta za politička pitanja i sigurnost**, na kojem je prezentirana Deklaracija iz Osla (usvojena na godišnjem zasjedanju PSOSCE-a u Oslu, juli 2010. godine) koja se sastoji od rezolucija usvojenih na tri komiteta. Prezentiran je rad Foruma za sigurnosnu saradnju, kao i aktivnosti OSCE-a u centralnoj Aziji. Rasprava je vođena o situaciji u Kirgistanu te o reformama OSCE-a.

Također su delegirane teme koje će biti razmatrane na narednom godišnjem zasjedanju (Beograd, juli 2011. godine).

Na sastanku **Komiteta za ekonomske poslove, nauku, tehnologiju i životnu sredinu** razmatrane su preporuke iz Deklaracije iz Osla, te je raspravljano o načinima borbe protiv trgovine ljudima.

Tokom sastanka **Komiteta za demokratiju, ljudska prava i humanitarna pitanja** vođena je rasprava o situaciji u Bjelorusiji i prezentirani su izvještaji o izborima u toj zemlji.

Pokrenuto je i nekoliko nacionalnih inicijativa.

Stalna delegacija Skupštine Srbije zatražila je tokom sjednice da se PSOSCE-a dublje pozabavi temama kidnapovanja ljudi i trgovine ljudskim organima. Poslanik Gordana Čomić je tokom rasprave saopćila rezultate koje je u svom izvještaju iznio specijalni izvjestilac Vijeća Evrope za Kosovo Dick Marty i zatražila od OSCE-a da se dublje bavi temom tog zločina. Istaknula je da će sačekati istragu, ali da zbog žrtava tog zločina smatra da je važno da se OSCE bavi temama kidnapovanja ljudi i crnog tržišta organima, bez obzira u kojem kontekstu i na kojoj teritoriji. Ona je rekla da očekuje da će i o tome biti riječi na godišnjem zasjedanju PSOSCE-a, koje će ove godine biti održano u Beogradu, u rezoluciji koju će OSCE pripremiti, te da države članice pokrenu raspravu u svojim nacionalnim zakonodavstvima u vezi s crnim tržištem i trgovinom ljudskim organima.

Drugog radnog dana Parlamentarne skupštine održana je sjednica Stalnog komiteta i zajednička sjednica tri opća komiteta. Na sjednici Stalnog komiteta, nakon obraćanja predsjednice Parlamenta Austrije Barbare Prammer, prisutnima su predloženi izvještaji predsjednika, direktora trezora i generalnog sekretara, kao i izvještaji posmatračkih misija OSCE-a o toku izbornog procesa u Azerbejdžanu, Moldaviji i Bjelorusiji. Članovi Stalnog komiteta usvojili su i šest amandmana na postojeći tekst Poslovnika PSOSCE-a.

Tokom zajedničke sjednice tri opća komiteta vođena je rasprava o temi "Imigracije, integracije i multietnički dijalog u OSCE-u", gdje su se učesnici izjasnili da multietničnost ne smije biti posmatrana kao problem, već kao prednost za sve članove društva, kao i da se proces migracije mora odvijati u zakonskom okviru koji je prilagođen i migrantima i zemljama domaćinima.

Na istoj sjednici usvojena je i zajednička izjava članova Parlamentarne skupštine u kojoj se navodi da PSOSCE-a izražava najdublju zabrinutost zbog sukoba i nasilja u sjevernoj Africi, kao i zbog neprihvatljive represije koju provodi Gadafijev režim u Libiji. U izjavi se dalje ističe podrška principima demokratije, slobode i ljudskih prava kao i spremnost OSCE-a da sa ostalim međunarodnim organizacijama (UN, EU, Arapska liga) učestvuje u sprečavanju daljnjeg izbivanja nemira i saniranju trenutnog stanja u spomenutim zemljama. Usvajanju izjave prethodila je rasprava o situaciji u Egiptu, Tunisu i Libiji.

Izvještaj pripremila
sekretar Delegacije PSBiH u PSOSCE-a
Jelena Rajaković

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- članovima Delegacije PSBiH u PSOSCE-a

Kopija: Ministarstvo vanjskih poslova BiH

***Izvještaj odobrio Branko Zrno, predsjedavajući Delegacije PSBiH u PSOSCE-a.**

Dostavljeno:

- naslovu
- a/a